

25/10/1997

PM jamin pulih nilai ringgit

Mior Kamarul Shahid in Edinburgh

EDINBURGH, Jumaat - Datuk Seri Dr Mahathir Mohamad memberi jaminan, masalah kejatuhan nilai ringgit akan dapat dibendung sebelum sebarang kemungkinan kelembapan ekonomi melanda negara.

"Sebelum kuasa beli rakyat bertambah kurang, sebelum rakyat mempunyai wang yang sedikit untuk dibelanjakan, sebelum harga barangan meningkat dan sebelum berlaku pembuangan kerja, masalah ini akan cuba kita atasi," kata Perdana Menteri ketika menemui pelajar Malaysia dari Scotland di sini, semalam.

Dr Mahathir dan isteri, Datin Seri Dr Siti Hasmah Mohd Ali tiba di sini pagi semalam untuk menghadiri Persidangan Ketua-Ketua Negara Komanwel bermula hari ini.

Perdana Menteri tidak menolak kemungkinan berlaku kelembapan ekonomi jika kerajaan terus membiarkan pedagang mata wang menggunakan kuasa wang mereka untuk meruntuhkan ekonomi negara.

"Apabila kuasa beli rakyat berkurangan, mereka tidak lagi mampu membeli barang. Peniaga pula terpaksa menanggung kos yang tinggi untuk membayar gaji pekerja. Kesannya, pekedai terpaksa menaikkan harga.

"Kilang juga terpaksa ditutup akibat keluaran kilang tidak dapat dipasarkan kerana rakyat kekurangan wang untuk dibelanjakan. Akibatnya pekerja terpaksa diberhentikan," katanya.

Bagaimanapun, Dr Mahathir berkata kerajaan mempunyai cara untuk menyelesaikan masalah itu jika rakyat berdisiplin dan bekerja keras tetapi kerajaan memerlukan sokongan rakyat untuk menyelesaikan masalah ini.

"Jika rakyat sanggup berdisiplin ketika berbelanja, tidak menggunakan barangan import seperti kereta mewah dan pada masa yang sama bekerja dengan tekun, kelembapan ekonomi tidak akan melanda kita," katanya.

Perdana Menteri menjelaskan, beliau akan berbincang dengan pemimpin negara Komanwel yang menghadiri persidangan Ketua-Ketua Negara Komanwel (CHOGM) di sini mengenai isu urus niaga pasaran wang yang menjadi punca kejatuhan nilai wang di beberapa negara.

"Hari ini ia menjejaskan mata wang di Asia termasuk Malaysia, Indonesia, Thailand dan Singapura. Hong Kong dan Taiwan juga menghadapi masalah yang sama. Sebelum ini keadaan serupa berlaku di Mexico, Argentina, Brazil, Afrika Selatan, Poland dan beberapa negara lain. Kita tidak boleh membiarkan pedagang wang begitu berkuasa," tegasnya.

Beliau berharap mendapat kerjasama pemimpin Komanwel bagi menyelesaikan masalah itu.

Dr Mahathir mengulangi, urus niaga pasaran wang mestilah dijalankan secara terbuka dan setiap pedagang mestilah mempunyai kemampuan dan modal untuk mengambil bahagian dalam perniagaan mata wang. Hari ini ramai mereka yang berniaga secara 'jualan segera' untuk mendapat untung segera.

Dengan menjadikan Soros sebagai contoh, Perdana Menteri berkata walaupun banyak pihak menuduh manipulator kewangan itu terbabit dalam manipulasi mata wang, dia (Soros) tidak mengaku berbuat demikian.

"Hari ini, kita dengar beliau menyumbangkan wang (AS\$500 juta) untuk membantu hal kebajikan di Russia. Dari mana datangnya wang itu? Dia mendapatkannya daripada kita," katanya.

Menyifatkan pedagang mata wang begitu berkuasa dalam menentukan ekonomi sesebuah negara, Dr Mahathir berkata, walaupun beberapa negara bergabung untuk mematahkan serangan mereka, ia masih sukar dilakukan melihat kepada jumlah wang yang mereka miliki.

"Mereka mungkin mempunyai AS\$100 bilion. Mereka mungkin mempunyai 20 kali ganda wang daripada kita. Bergabung dengan beberapa negara sekali pun, kita tidak boleh menyaingi mereka," tambahnya.

Perdana Menteri juga tidak faham mengapa kebelakangan ini ada dakwaan mengatakan pelabur mulai kurang yakin dengan suasana pelaburan di Malaysia.

"Sebenarnya pelabur besar yang mempunyai kilang dan modal terus yakin dengan suasana pelaburan di negara kita. Yang menjadi masalah ialah pelabur mata wang yang berusaha memanipulasi nilai mata wang kita untuk mendapat untung. Setiap kali mereka menjual ringgit, nilai wang kita jatuh," katanya.

"Apabila ada orang yang tamak, mereka akan melakukan apa saja untuk membuat untung. Ini dilakukan dengan menjual mata wang dan menyebabkan nilainya jatuh. Bagi mereka yang bimbang nilai mata wang terus jatuh, mereka pula menjualnya. Ini menyebabkan nilai wang terus jatuh," tambahnya.

(END)